



木門十四家詩集 上

六

14
137
38



門 4
號 127
卷 28

木門十四家詩集

石梁	南山	滄浪
竹圃	伯陽	淨菴
	禎卿	竹軒
	伯玉	鶴樓
	子彝	西山
	梓山	篁洲

木門十四家詩集

室直清

室新助號滄浪
又鳩巢賀州人。

和白石中秋韻

嘉會羣英集。誰如此勝遊。桂華疎雨滴。夜色大江流。對
 酒心增壯。感秋思轉愁。更聞歌白雪。遺響滿高樓。
 大雅今淪沒。徒勞文士遊。斯人懷藻思。為我激頽流。令
 望交朋慕。遺賢世主愁。秋來風月好。何當共登樓。
 良辰難屢得。豪興好凭欄。銀漢雲方淡。金尊露不寒。團
 圓明月滿。荏苒素秋殘。惜此年華晚。正頭仔細看。
 高樓歌吹起。華燭照朱欄。材足賦秋興。月堪伴歲寒。風

甘雨亭書
流之子在唱和。幾人殘。向暗休投。癖兒按劍看。

將赴北。追用前韻。寄白石。

問道名都下。相如未倦遊。凌秋馳逸志。弄月俯清流。高
調罕人和。非材增我愁。豈知瓊玉報。持照故園樓。
自和陽春曲。不空萬里遊。匆忙人北去。眷戀水東流。得
此明珠照。若無永路愁。天涯如看雁。相憶上江樓。
美人歌靜夜。曲罷月低欄。攀桂碧霄近。抱珠白屋寒。歲
時更代謝。顏色恐摧殘。報我新詩在。慙勤青眼看。
別路秋云晏。郵亭行傍欄。懷人關月白。飲馬塞雲寒。風

土世情冷。詩篇古意殘。千山多美景。何似共君看。

別作寄別白石

同門英俊共推君。先得佳篇愜素聞。良覲何時酬宿昔。
奇才從此立功勳。莫嗟當代無楊意。不待後來有子雲。
珠玉詩成知滿案。好風千里幸相分。

丁丑元日

洞門晴雪踏如沙。劍佩夜鳴肅不譁。玉漏聲殘催上閣。
金爐香泛惹歸家。千年壽色南山近。萬里恩波北海賒。
預喜春華添甲子。高堂二月剩看花。

三元淑氣繞庭闈。遊子歸來著綵衣。梅柳連江春暗度。
雲霞映塞雁將飛。尋常未信仕何早。四十無聞心更違。
縱使青陽假烟景。應須白日下書幃。
千山曙色雪明樓。回首高城佳氣浮。天上歲華來北地。
人間世事付東流。平生養母有餘樂。一日讀書消百憂。
新進少年皆俊傑。嗟將遲暮對貂裘。

新年見白石詩。遂和其韻以寄二首。

故人官達在東州。文學高科言子游。白石歌殘傳節奏。
青雲會罷想風流。星辰氣壯劍橫斗。棣萼春輝花繞樓。

日暮梁園將授簡。上才自古重諸侯。

右和元日。

宦書擎出寵光浮。縹帙裝來遙下樓。賜予還思誓古力。
遭逢何負曳裾遊。百年好事同皇甫。一代明經繼夏侯。
家產鳳雛文彩在。知君父子擅風流。

右和歲初志喜。

用前韻疊和白石見酬二首

聞道詩名傳帝州。洛陽才子羨交游。三都賦出紙將貴。
五色筆飛錦欲流。報我瓊瑤照遙夜。思君江海坐高樓。
幕中掉舌於良足。何必生封萬戶侯。

在樊邑。聞之京師。人云洛陽詞客畏。

白石才。仰慕之久。每其詩必傳誦焉。

白雪幾回聞楚謳。客中復上仲宣樓。夷門感知一麾出。
泗水從師十載遊。李白文才傾寵貴。井丹經術倒王侯。
舊來何處思玄度。明月清風碧玉流。

復用前韻言懷二首

浮生自分老邊州。桃李門前多舊游。家在隴頭人北望。
春來江上水東流。清談未接陳驚座。佳句先逢趙倚樓。
心事飄零今已矣。功名懶復說封侯。

長鉞歸來薛下謳。高秋憶上庾公樓。彈冠當日羞先達。
鳴玉如今感昔遊。丹壑已招遺世士。青門休問舊時候。

漁人自有滄浪曲。難比清江萬里流。

和白石用前韻見寄六首

精敏無雙柳柳州。聲名藉藉壓豪游。詩亡千載續高調。
文歇六朝澄濁流。都下爲開招隱館。苑中欲築望英樓。
舊時一見知韓信。今日何曾愧鄭侯。

自聽師門名下謳。歸心忘却故園樓。長卿爲客蜀都久。
子夏充賓魏國遊。曾賦上林驚武帝。還論古樂對文侯。
伯牙應識知音在。萬里澄江入曲流。

東來何幸識荊州。也足歸家學少游。別比秦吳元絕國。

道宗洙泗與同流。阮瞻徵辟是三語。杜甫行藏唯一樓。
四十知君心不動。更堪好辨說諸侯。

河西變俗宋門謳。實慰我心聊上樓。明主好文如異代。
奇材應恨不同遊。標梅十載賦周士。菘竹萬竿美衛侯。
詩酒相邀何日見。佳人宛在水中流。見示家有十年梅。故予用求我庶士。

烟羊
可疑

振古英雄有豫州。執受不用問先游。夢餘芳草精神注。
曲裏幽蘭香氣流。高義知君逢下榻。客愁憐我賦登樓。
丈夫處世貴知己。莫說烟羊關內侯。

尔美
可疑

秋憶歸舟發棹謳。天涯相望海邊樓。宿昔欽名如已有。
生平多幸與君遊。宜使國風傳尔美。果聞朝命寵賢侯。
材慚伯仲鄴都客。欲挹詞源二峽流。

附三絕句以代尺牘

孤館聞鶯消白日。高城送雁瞰蒼流。故人此句知誰歎。
須在開元以上求。

性僻從來佳句耽。師門幸得我岑參。汝南今見品題定。
何用世人容易談。僕不自揆。謂白石作甚似岑參。

唱和君休莫盡歡。非關詩思得閑難。傍人不解我推讓。

恐作短長相競看。

中秋二首

海天白玉盤。推上碧雲端。影過銀河冷。明凝金闕寒。嬾娥長不老。蟾魄幾團圓。置酒親闈夕。笑談到夜闌。復見瑤臺鏡。高懸霄漢間。瓊華堪可贈。桂樹杳難攀。爽氣通滄海。雲光動白山。秋風吹不去。長此照人間。

此夜對月懷君美二首

中夜桂香動。清光漫欲流。砧鳴新霽月。雁度故關秋。北地嗟今老。西園憶昔遊。佳人音息闕。相望一層樓。

無恙井君美。新詩應日多。盍簪今夜宴。叢桂舊時歡。離索令人恨。團圓奈月何。天涯秋半晚。心事自蹉跎。

庚辰元日

誰將玉燭轉遙空。復見歲華今古同。五色雲開鵬擊外。萬家春到鳥聲中。無如衰鬢雪催白。且喜酡顏酒借紅。冷蕊一枝梅可折。欲持贈遠寄東風。

春日思親十二首

五更殘夢遶階除。忽憶慈親生我初。林際開行陪杖屨。簾前春誦授詩書。家庭事事多遺愛。風物年年感故居。

獨有薦新祠廟日。終朝和露摘園蔬。

春來雨露下庭陰。孝子思親怵惕心。馨歎如聞趨欲就。形容入夢寤猶尋。終天永訣死生隔。雙淚百年歲月深。爲報新鶯花柳外。翩翩美尔好其音。

春風新奏舊絃歌。從此門人廢蓼莪。祿養不終生有限。孝心自誓死無他。慈恩負戴山河重。長夜寂寥日月多。一世功名今懶道。萬鍾縱得奈親何。

遲日沿流採白蘋。誰知幽意爲慈親。青山雲斷悲孤雁。綠水春歸懷一人。不待陽和風落木。早違令養淚沾巾。

滄洲猶未拂衣去。羞此抱關擊柝身。

草暖雪消春滿堂。慈親棄我去何鄉。夢中雲在魂俱白。愁裏花開淚亦香。佳日空懷雙慶樂。傷心無奈九回腸。自甘辜負歡娛地。長此黯然悲歲芳。

芳草萋萋人不還。蹉跎四十二年間。當時爲子羞無狀。今日思親易厚顏。生理荒涼春後雪。憂端重疊海心山。腐儒身世元相棄。一任東風鬚髮斑。

先人待我異常兒。無賴如何負所期。孝養今愁烏不若。悔心日積駟難追。簾帷香歇烟霞恨。階砌苔生花鳥悲。

廿四詩集
願向東風斬茅竹。結廬家上此棲遲。

白日傷春半下帷。依依草色戀親時。幽懷好借黃鸝語。
衰髮欲兼碧柳垂。手澤殘書敢忍讀。淚痕點字始成詩。
寄言同慶諸君子。金玉爾音慰我思。

去歲除喪意未平。今朝霞彩映簪纓。春歸舊宅人安在。
日暖空庭草自生。綠酒尊前何耐酌。瑤琴花下不成聲。
百年徒慕知無益。須早為親遺冷名。以下專思母。

一自別親掩寢門。黃泉無路達晨昏。三春花白孝心潔。
雙樹棠青敬意存。追想音容常飲泣。長悲離別欲銷魂。

孤生不及庭前草。猶沐新陽雨露恩。

後堂前有桑兩株。家母手栽。

母氏臨終強自扶。慙勤謝我久勤劬。俯思慈念死難報。
泣受遺言絕復蘇。雙袖猶餘他日淚。殘生只愧舊恩軀。
春風如到九原路。為引陽和上綠蕪。

憶昨辭家行役時。春來秋去欲歸遲。朝朝陟屺兒悲母。
暮暮倚閭母泣兒。豈謂絲衣為素服。忽將死別變生離。
泰山如礪河如帶。此恨綿綿無盡期。

立春

海上敝廬獨老身。柴門送臘又迎春。葭飛鳳管報時泰。

水暖湯盤銘日新。一片冰心梅舊識。百年青眼柳相親。
邊雲朔雪世情冷。唯有東風似故人。

辛巳元日

條風昨夜入郊坰。吹向玉階開瑞賞。卯酒三杯羞後酌。
漁歌一曲笑先醒。曙窓雪疊山河白。滄海春兼天地青。
莫怪腐儒心轉壯。年華未到髮星星。

和阪井生元日韻

中天樓閣五雲開。曉上高城雪皓皚。地接三州元氣合。
川分二水碧流來。玉階旭日搖仙杖。金殿餘霞落壽杯。

不有故人傳絕唱。春心辜負後園梅。

年初同等輩監城門。見早朝公所人。

三竿初日照城闌。碧瓦樓臺淑氣新。飛鳴階前鳧影集。
曳裾庭上鷺聲頻。夷門舊監侯嬴老。魯國諸生原憲貧。
漸覺風光入佳境。欲賒斗酒買青春。

送石梁赴東都

海上秋風拂遠林。行行客路越山陰。狼聲三叫月初落。
鯨浪千重日欲沈。鄉夢多迷烟樹暗。家書遙寄塞雲深。
武陵同學如相問。斗米折腰違寸心。

步前韻酬白石

東海精廬開半林。百年遺愛倚棠陰。曾歌牛下材無歎。
長抱龍泉光不沈。桃李對門春色晚。薔薇分影露香深。
更知天祿校書日。應是良工多苦心。傳聞親藩近有編撰之事故斷聯及此。

一去武關歸舊林。白雲相望結層陰。河梁別久翔鳧恨。
滄海書稀雙鯉沈。夢裡題詩芳草積。樓頭聞笛落梅深。
春來新沐琅玕贈。何以報之明月心。

賦水墨梅效陳簡齋體四首

高人盤礴倚欄干。淡墨拂來數朵寒。欲寫此花幽絕處。
長留疎影月中看。

紅醉白醒兩鬪新。年年先報洛陽春。相看堂上黯無色。
應是守玄謝世人。

玉質天成自不緇。松烟拂面倍清奇。寄言桃李縱相效。
恐似無鹽學病施。

桃李園中久見君。却悲野鶴在雞羣。一從尸解辭春去。
清影依然入水雲。

謁管公廟

丞相廟前望欲迷。東風遙度草萋萋。梅花似戀舊時別。紅白千條吹向西。

花落廣庭半減春。年年報祀憶宗臣。風流瀟灑今安在。霄漢高懸月一輪。

在昔中朝逐屈原。終身不復入君門。尚思謫去三年後。空抱宮衣泣舊恩。

秋興八首。和老杜韻。

壬午之年。滄浪因石梁乞予批者也。

蕭瑟秋風動碧林。天邊樹色鬱森森。鯨鯢蹴浪海氛惡。猿狖嘯雲山氣陰。鬢際霜侵多病日。腰間龍泣未灰心。

樓前一片如鈎月。別恨誰家送夜砧。

城上樓臺開曙輝。重門鐘漏遠微微。空庭霜下青梧落。絕塞雲來白雁飛。通國交游知己少。夙齡遐尚與人違。

世間年少慢儒客。肯信身貧心轉肥。

歲晚滄江日易斜。病來分外減容華。人間只負思歸鱸。天上難浮乘月槎。千載悲秋傳楚調。萬家牽恨入胡笳。樽中綠酒香新熟。欲傍東籬摘菊花。

一世浮沈似覆棋。老來蕭索此傷悲。毛生捧檄違親後。揚子談經報主時。日落欄杆閑坐久。月生河漢欲眠遲。

慇懃絡緯四隣夕。應是燈前機婦思。

嵯峩白雪賀蘭山。鳥道開天咫尺間。萬里夕陰雲出塞。

五更曙色月臨關。康侯錫馬日中寵。報國羣臣霜後顏。

誰識夷門鳴柝者。昔年曾是點清斑。

寥落舊游多白頭。幾回同役海東秋。天台嶺北霞光落。

日本橋西月色愁。身託他鄉送歸燕。夢回孤島狎輕鷗。

相逢共說昔年事。此日凄然憶武州。

十年游學愧無功。為客逢秋草路中。清曉夢殘荷葉雨。

黃昏笛斷柳條風。異鄉到處眼終白。同侶幾人顏共紅。

書劍歸來最蕭瑟。滄浪一曲和漁翁。

遠林平楚渺逶迤。萬頃秋田匝鄭陂。野外荒墳碑仆草。

村中古廟鳥棲枝。山河長對白雲在。人代寧知滄海移。

誰子杖藜懷古久。愁吟隴上日將垂。

題富士山二首

徐福尋仙海上浮。滄波何處問瀛洲。紫烟忽認遙天雪。

蟻附東西六十州。

上帝高居白玉臺。千秋積雪擁蓬萊。金雞呶啞人寰夜。

海底紅輪倒影來。

金雞紅輪一聯。余嘗東遊親見之。非徒用泰山事也。

東武冬夜對月

關門月色淨如秋。終日風霾夜始休。遊子忍寒苦相對。通宵應照故園樓。

不破氏一枝亭八景賦得蓮池夏月

芙蓉池上夏先寒。玉色玲瓏承露盤。時有微風閑度水。幽香和月到闌干。

代乞人

城中得食暫來歸。兒死無聲在母衣。取飯與妻妻泣說。縱餐能療幾時饑。

春遲

楊柳未垂花未紅。家家簾幕掩東風。春歸江上無尋處。只在青青衆草中。

蒲桃歌奉寄順菴先生

先生庭前有蒲桃一架。滋蔓殊甚。因為歌一篇。始言先生之道如花之美。其教人如風之動人。無賢愚皆化其教而樂其道。次言賢子連壁不忝所生。終言先生親族之盛。實以積善累德而致之也。

蒲桃歌。蒲桃歌。先生願聽我一歌。蒲桃成陰鬱萋萋。託
生先生書堂西。露裛香葩相鱗次。風吹嫩葉正昂低。美
人携手爭攀折。飛鳥啣子幾來棲。庭影離離日正午。人
自忘歸鳥自啼。非關桃李矜艷色。由來此物下成蹊。蒲
桃歌。蒲桃歌。先生願聽我二歌。嘉實粲粲新熟成。人言
謝家玉樹生。上枝磊落垂珠璣。下枝玲瓏綴水精。光彩
流味無與比。都人爭傳動帝城。蒲桃歌。蒲桃歌。先生願
聽我三歌。自一結根經幾時。引蔓布濩增繁滋。秋月明
夜沐宿露。曉霧開處映晨曦。宿露晨曦有恩光。交相扶

持人不知。豈特一時發榮耀。本支百世猶可期。蒲桃歌。
蒲桃歌。先生願聽我四歌。先生卜隣錦里街。共種蒲桃
當庭隅。隣家忽見滿架綠。曾不終月半已枯。豈如先生
所種者。疊葉結子四分敷。來觀嘆息何能爾。先生不答
趨問余。君家土地不彼若。無如封植積功殊。先生自從
移植來。孳孳不肯辭勞劬。朝溉半液暮培土。如此數年
未少渝。寄言東隣復西鄰。如君忘勤終荒蕪。

王戎

隱去非真遜世徒。起來寧有救人謨。園中好李獲多少。

半恐
米

魯相拔葵。迂不迂。

武城春望

陌上烟霞眺望平。山櫻花發自分明。滿川風雨舟緣岸。
負郭樓臺水遠城。要路誰家車馬簇。儒門到處講論清。
浮名於我終何益。只愧滄浪未濯纓。

三宅氏八景賦得管廟夜燈

森沈野廟祠丞相。遺德在人神所憑。讒口當時成貝錦。
天威不早啓金滕。忠魂應返三更夜。心事猶懸一片燈。
撫枕中宵多古意。向風慷慨寢還興。

道中作

十里芳塘春樹間。一川晴色遶青山。前村隔水微茫在。
惟有白雲自往還。

寄題鎌倉瑞泉寺

聞道瑞泉寺。開亭洞裏天。白雲縈水木。滄海積風烟。眺
望三千里。荒蕪四百年。何時幽討去。靜夜寄高眠。

螢火

螢火何凌亂。不嫌白露寒。徘徊池閣上。輕颺暮雲端。傍
箔疑珠綴。穿林似燧鑽。瑤華如可拾。留與故人看。

送友人赴東都

遊子晨裝罷。門前嘶紫騮。柳條堪可折。竹葉暫相留。暑
退新秋雨。涼生故國樓。慈親幸無恙。千里緩離愁。

又

陽關三疊暫盤桓。相送高樓月色殘。劍氣遙侵霄漢動。
馬蹄遠躡塞雲寒。離家還憶倚間望。許國何言行路難。
萬里秋高如見雁。爲書數字報平安。

初雪二首

北嶺初飛雪。隨風過萬家。微微當戶落。脉脉隔簾斜。未
沒庭前草。纔成樹上花。寒棲無暖意。薄暮酒應賒。
雨雪三冬暮。寄身一草堂。漸添平地白。欲奪遠林青。輕
素疑花落。微寒覺酒醒。更欣半穀熟。含哺樂生靈。

遊稻垣氏林亭二首

臺榭臨秋岸。攀躋出晚烟。羣峰低檻外。大海落天邊。遠
景通千里。幽懷復百年。不知山月上。倒影入前川。
經過幽僻地。炎暑不相侵。荒徑人蹤少。空林鳥道深。秋
風生綺席。山月洗塵襟。試與同懷客。和君清夜吟。

秋日旅懷寄越中故人

廿兩亭書
兩年爲客事多非。依舊西風復入衣。越路雲長人北望。
武關木落雁南飛。他鄉秋是江頭晚。故國家唯夢裏歸。
欲識別來知己少。夕陽松下掩柴扉。

擬古三首

灼灼堂前桃。濯濯堂後柳。一朝秋霜至。不意搖落久。枝
只風雨侵。蕭索慙賓友。四壁無所庇。况乃親杯酒。及今
猶改植。庶免宿志負。寄言豪貴子。作室當託厚。我有冬
青樹。願易君所有。

燕山有羈客。歲晏衣不完。旅食二十年。縵縷著南冠。北
風海上至。飛雪凋人顏。比隣何蕭條。苦辛義相關。誰家
絃歌作。飄揚聞雲端。酒酣樂未央。鳴琴不罷彈。楹間旣
來鳳。階下亦舞鸞。借問綺羅客。寧知此苦寒。

二月日始暖。空庭鳥相和。佳人感物化。抱琴亦長歌。歌
罷復嘆息。離居經年多。艷艷桃李樹。相思掇其華。過時
無所贈。飄零我若何。

和陶詩

榮木四章。章八句。

苑苑榮木。垂枝于茲。君子令德。四方蔭之。威儀有則。動

甘肅亭叢書
作有時。忻慕君子。胡不擇而。

菀菀榮木。深深其根。英華外彰。天機內存。君子養心。乃德之門。庶類以成。衆善以敦。

人而不學。云何固陋。亦旣學矣。專用其舊。聖謨洋洋。嘉言孔富。我之不進。中心孔疚。

斯道在人。千歲未墜。由也好勇。聖門所畏。策彼駑馬。以追良驥。遲速雖異。同歸千里。

和郭主簿

長夏午景靜。嘉樹鬱成陰。颯風自南來。穆穆吹我襟。大

哉虞帝歌。寄懷五絃琴。好古良自昔。心醉遂至今。故人同此意。高義夙所欽。杯酒方獨持。無乃就我斟。間關林中鳥。求友爲好音。禽鳥猶如此。獨不念盍簪。尚子爲一來。故使吾望深。

歸田園居

自始從官役。無日忘丘山。矧伊桑榆景。值我將老年。魚躍不襄陵。獸挺寧在淵。違性少所宜。歸耕南野田。隣並八九家。屏跡白雲間。晨出隨衆後。暮還居人前。團團遠村樹。荒荒近市烟。牛羊日夕下。返景在山巔。營生各自

遂靡爭與物間。醉卧東軒下。愉悅在自然。

飲酒三首

富貴如浮雲。遑遑欲安之。苟合我所恥。直道非其時。偃息南窓下。樽酒復在茲。人生會有盡。知命貴不疑。先民貽高矩。百年可自持。

十載此卜居。鄉曲少耆英。隔籬呼隣人。笑談暫慰情。請君入宴息。西嶺日欲傾。庭樹曖已暗。衆鳥爭枝鳴。衡宇雖湫隘。聊可託吾生。

異端蠹吾道。微言反亂真。舉世競浮靡。澆風孰使淳。如何談經士。相師皆務新。寧獨罪楊墨。且無論儀秦。曰余秉微尚。中路落世塵。舊聞幸未失。溫習固已勤。惟道無隱顯。居敬道自親。求道不由茲。茫洋如迷津。恐我醉失儀。嚮晦整衣巾。斯言邇可遠。敢論同志人。

擬古

夙齡卓不羣。凌厲好遠遊。負笈趨千里。求友徧九州。鄒魯問遺風。江湘漱清流。道成無所用。歸來卧山丘。自悲生世晚。不遇殷與周。吾非長往者。猶望君見求。

贈羊長史

吾聞仲尼道。開源自唐虞。唐虞雖已遠。舉行有其書。之子抱利器。洋洋適西都。秦嶺今萬里。關河行當踰。長安多豪貴。願盼在下輿。寧知鍾鼎功。無可與之俱。子道苟有合。不怪久躊躇。自從嬴氏來。王化遂闕如。叔孫雖制禮。廟堂亦就蕪。羣雄迭相攻。百姓無復娛。此行縱有遇。恐二生見疎。丈夫貴潔已。願子時卷舒。

九日間居

節序遞推遷。長勤在平生。日月陽存至。庶我恆此名。兩霄秋氣澄。雲斂天宇明。時菊散晚芳。鳴雁響哀聲。寂寂衡宇下。棲遲終百齡。滔滔車馬客。飛蓋無一傾。道在窮通樂。心安生死榮。蟬蛻污穢中。如見古人情。登高亦何爲。但使志有成。

詠荊軻

大運有興沒。興沒在姬嬴。弱燕何能爲。惜哉殺荊卿。時至西趨秦。眼中無咸京。易水何蕭蕭。送我萬里行。賓友來飲餞。四座垂素纓。沈深有餘勇。隱如百萬英。高歌和漸離。悲風飛羽聲。衆客一慷慨。猛氣衝冠生。酒酣爲樂久。相顧壯心驚。遂去入函關。詣闕始通名。秦人無同仇。

見變仰陞庭。危哉呼吸間。不得保金城。祖龍魄先死。事
往仍屏營。丈夫身報國。不必奇功成。雖非忠義列。邈然
絕世情。

甲申元日

今朝風雪茂微陽。歲酒不辭傾數觴。幾處門前長者轍。
誰家坐上令君香。春來懶用三冬史。年去唯餘兩鬢霜。
昨夜早梅新吐玉。侵寒折得一枝芳。

木順信

字敬簡。號淨庵。先生長子。

中秋雨

今夜豆花雨。追想去年晴。不見團圓影。祇聞浙瀝聲。無
絃還有趣。淺酌更深情。聊足發清興。露湛眼自明。

西山塾友惠朝鮮酒餅以謝答

麇餅光如漆。遠自樂浪臻。上窄驢蹄促。下豐豕腹均。温
醇宜近火。蓄旨耐存神。非翅借書助。養真慰老親。

問西山養痾于府邸

近別旬餘似隔程。幾回舉首意難平。宿痾應瘳勲珍攝。

小愈易加調衛營。肩豎彭仇防瞰隙。青囊丹鼎耐頤精。
竒方幸有刀圭好。泰宇那憂鄙吝萌。交對黃封眞莫逆。
詩逢白戰慎佳兵。讀書元誦西山記。排律長吟東武行。
英譽芳芬八叉手。偏師委靡五言城。文章少技優游足。
性善四端充擴成。學問無他唯孝弟。功夫到處在誠明。
輔仁須待盍簪益。養氣相期勿藥亨。半夜井梧飛一葉。
九秋月桂照三更。黑貂裘舊風霜冷。素帝令嚴林壑清。
未卜新歡供筆硯。猶思久要慰心情。經過傾倒知何日。
先托墨卿尋社盟。

木寅亮

木下平三郎。字汝弼。號竹軒。先生次子。

元日

五夜東風拂碧天。津津物色更清鮮。雲霞遠接關門紫。
梅柳輕含滄海烟。春入鯉庭懷喜懼。窓忙駒隙背覃研。
寸心深識君恩重。素食猶慙犬馬年。

牽牛花

柔條百尺繞籬藩。秀萼千包日未暎。風力吹醒卯時醉。
露華聊借一朝恩。縹囊分色映書帙。翠幙飛光滿酒樽。
欲識花菴稱獨樂。綠葉陰中晝掩門。

中秋

海風吹雨過東樓。一色長天素影流。鏡鑄江心龍忽起。
犀燃水底魅空愁。無邊光霽濂溪月。不昧虛靈雲谷秋。
仙客由來多妄誕。廣寒莫浪說清遊。

美人早起

景陽鐘度夢魂殘。推枕攪衣臨慵看。鏡面餘霜春色冷。
簾鈎留月曉光寒。細腰柳動烟猶淡。渴肺花露露未乾。
朱戶半開懸竹葉。羊車何處得盤桓。

冬日牡丹

豈圖霜枿放春紅。培養能移造化功。菊讓姚黃呈土色。
楓餘蜀錦助天工。靈丹忽■藍關雪。詩律潛通黍谷風。
分得梅君香世界。花王創業歲寒中。

戊寅元日

黃鳥朝來有好音。要令舊業入新吟。二陽交泰古今治。
二氣流行天地心。對卷寸陰輕尺璧。論文敝帚享千金。
世間何事比吾喜。堂上靈椿壽色深。

和白石示韻

乙亥季冬。我藩邸賜
與六經。故詩中如此。

漢室藩屏春樹森。惠風發藻及儒林。莫誇梁苑延賓宴。

可識東平樂善心。千古新文公探賾。四方攸則德輝今。
五經元是君家事。談論紛綸得意深。

田伯隣 號鶴樓

寄友人

眼看春色易蹉跎。一曲樽前擊節歌。洛下少年顏色改。
江南遊子別離多。今來千里長相憶。病起三春半欲過。
忽識林僧揮手後。看山對水入嵯峨。

寄僧

樹裏鐘聲度上方。層雲晨吐白毫光。遙知立雪過僧臘。
更憶看花出帝鄉。茶苑晴烟携袖綠。橘洲風雨入窓香。
青天飛錫歸何日。折芻西來海水長。

牡丹

富艷移栽錦被堆。隔簾疑是美人來。巫山朝去雲猶在。
梁苑春歸雪未開。照膽鏡中應謝妬。及魂香裏莫相猜。
臙脂露濕東風面。宿醉初消向玉臺。

題壁二首

燕拂疎簾午影移。閒彈銀鑷數莖髭。誰憐抱病初禁酒。
自悔偷閑不善棋。野客細談栽菜候。佳賓多負賞花期。
山光水色長如此。只恨歡情異昔時。

江頭風日映簾疏。靜對閑雲啜茗餘。長嘯偏宜居種竹。
浩歌不嘆食無魚。家童懶睡妨丸藥。野客謾談罷對書。
却覺他年山水癖。老來最好伴樵漁。

寄僧

日煖春風蝴蝶飛。落花深處綠薇肥。詩僧時向禪餘過。
酒伴漸從病後稀。千里夢魂多不到。十年心事半相違。
東山又有佳期在。更對千峯欲拂衣。

雨中送春。同梁蛻巖席上卒賦。

客有前期冒雨來。衡門時拂綠苔開。情多共惜青春去。
交久初知白髮催。細竹林中新迸笋。斜枝葉底暗藏梅。

同盟自是多間暇。濁酒青燈信宿回。

泛江觀諸舫遊人

水接遙天霽景澄。山光遠帶寒烟凝。隔簾窺見隣船妓。
登岸相尋野寺僧。衣爲引涼宜著袷。坐因愛夜不須燈。
人家半隱蘆花裡。客散洲前待月昇。

中秋和復軒韻

霜黃橘子晚香浮。舞鶴翩然置酒樓。月挂西宮團扇怨。
風生北塞角聲愁。輕雲欲散迷鴻影。宿雨初晴漲水流。
幸以故人詞賦在。今年不減舊年遊。

九月十三夜天爵堂陪宴謹賦

嶺雪西來色滿堂。金城暮鼓白雲長。桂舟不讓中秋景。
菊蕊猶餘九日香。欲問登高誰作賦。且歡對月共飛觴。
階前玉樹皆堪賞。一夜絃歌樂未央。

丙戌中秋前梁蛻巖有約不來賦贈八首取四

南天月挂白雲飛。晚出師門負笈歸。去路過橋雙屐冷。
歸扉隔竹一燈微。芙蓉闕下誰先達。桂樹山中世已違。
同學故人肥馬客。近傳郢曲和人稀。

醉攀楊柳武昌城。此去高秋送尔行。風雨傷心離別色。

甘雨亭叢書
海山無恙兄弟情。歸期已在鄉關近。旅夢天低草樹平。到處勝遊殊不惡。誰家對月斷鴻聲。

高秋天氣雁來初。宿雨漸晴樹影疏。坐上笑迎新月色。江南領得美人書。多年慣識雙龍劍。此處常容駟馬車。風物欲添潘岳興。二毛應復賦閒居。

皎潔冰輪出海遲。清風搖竹座來移。三秋好景當今夕。十歲歡情異昔時。醉後冰心渡湘水。夢回山意憶蛾眉。捲簾撒燭渾如畫。娓娓天明坐莫辭。

再和八首取五

柳色蕭然月照軒。吟餘醉夢日昏昏。廬山別後安禪久。彭澤歸來勝事繁。社裡白蓮傳漏刻。籬邊黃菊對琴樽。新篇好得如陶謝。一夜燈前可細論。

羣賢齊唱鶴南飛。滿坐春風盡醉歸。久識青雲目前在。初窺白髮鏡中微。鱸膾此地歸應好。鷄黍今年約不違。共道公門桃李外。謝家蘭玉似君稀。

才子倦遊身未達。青燈濁酒豈同羣。三秋獨對臨邛月。四壁猶看蜀道雲。鸞賦應須驚武帝。彈琴猶未試文君。昇仙橋上從題柱。定識盛名天下聞。

一徑霜風葉落初。慣看酒伴近來疏。埃塵不到題詩壁。
竹氣漸侵種樹書。月下清風徐孺榻。江邊熟路呂安車。
相逢此處須乘興。莫問幽蘭賦卜居。
月下當樽夜卧遲。客來秋水野航移。非關觀裏看花地。
却約山陰對雪時。幾歲著書應養老。何人舉案為齊眉。
共言吳魯多知己。謾出東關不可辭。

送友人路過濃州赴京

宦遊西更赴長安。客路風霜綠髮寒。岐嶺鳳鳴雲尚在。
關河鷄唱月猶殘。東方藩衛行周甸。北闕威儀問漢官。
相思樓中吹玉笛。櫻花半似古時看。

次韻僧和駕湖中秋

喜字
可疑

月挂東林落葉飛。禪餘閑向虎溪歸。翻經喜氣漸侵榻。
洗鉢荷香欲觸衣。佛室磬寒棲鳥穩。漁家燈暗路人稀。
山光水色秋將半。未聽陶潛賦昨非。
幾人邀月欲登樓。雁度南天落木愁。海淨入簾千里暮。
山明當戶滿輪秋。從師法悟青蓮喻。贈我詩羞白璧酬。
下界浮雲何得蔽。禪心一片自悠悠。
秋空月裏振金鈴。樹色遙含海色青。鶴下晴空飄片雪。

螢流暗水點疎星。屏間畫燈看垂釣。几上詩篇誦采苓。
此去相逢清淨地。醍醐何日使吾醒。

贈梁蛻巖

江南一別感居諸。况復秋風萬里餘。有客應聞洞庭雁。
憑君尚問武昌魚。樽前遣興聊持酌。海內論心幾寄書。
昔記東山歌舞在。風流近日又何如。

薄暮天晴雨洗塵。風輕雲散白鱗鱗。江南夜色邀新月。
洛下秋光憶故人。病起一樽聊對酒。書來千里而爲隣。
簾前又見秋霜色。鏡裏無那素髮新。

與君幾歲且論交。興動猶疑月下敲。白眼誰知高士想。
玄言已被世人嘲。涼多露氣仍苔罅。雨歇風聲滿樹梢。
日暮碧雲君不見。半墻松竹掩衡茅。
知君三歲此棲遲。白晢紅顏養性姿。何問魯連浮海日。
笑聞支遁買山時。十年有約雲堪贈。萬事忘機鳥不疑。
莫道歡情非少壯。酒中猶有樂新知。
曾賦歸來若等閒。逍遙居止寄人寰。門前楊柳秋將半。
池上蓮花夜正閑。鄉曲君今折腰後。社中我亦攢眉還。
無因遠問東林路。惠遠當年不出山。

送入西歸

自謂西歸客。遠如去故鄉。白雲臨別酒。綠樹映行裝。只羨遊伊水。無因問洛陽。昔時携手處。今日不曾忘。

古劍

楚鍔吹霜氣。精光歲月多。清泉寒可洗。赤土滑相磨。況向軍門舞。且將客舍歌。夜來龍欲吼。神物更如何。

邊城秋詞

胡霜漢月照刀環。百戰沙場久不還。萬馬夜嘶青海戍。孤鴻秋度玉門關。

秋日同梁蛻巖暮過僧院

蓮開白社月明多。獨許淵明載酒過。廬岳重來三笑路。漢關休唱五噫歌。

和湖韻

遠樹鐘流缺月孤。蓮枯無夢到西湖。溪橋景色秋如此。便使我曹入畫圖。

七夕閨詞

又有七夕寒詞。貧女詞。居姑詞。倡婦詞等。滑稽可笑。

一別兒夫欲問邊。秋風依劍白雲天。黃河不似銀河遠。已約歸期動隔年。

春日江行

溪橋春水滿。山色雨中移。竹淨聽鶯處。花飛駐馬時。

春盡送人

送君芳草地。併欲送春歸。一別千山路。楊花到處飛。

倣梁蛻巖古閨中作

陌上逢郎處。花間顧妾時。兩心傳密意。不使外人知。

和泉南庚金氏號梅所

半路雲山夢乍回。交情詩思兩相催。千人白雪韻難和。一座青雲笑未開。桂樹遺篇招隱後。梅花芳信寄書來。

樓中黃鶴今猶在。當日仙翁醉玉杯。

烟草

南夷烟草昔誰栽。縷切盤中小作堆。不是碧筒通酒氣。應須玉管動葭灰。山中怡悅雲堪贈。座上飛談霧捲來。莫問紫陽仙子術。餐霞吸景到蓬萊。

